

gelobe wir vorgeanten burgermeister und rotlute und alle unse nochkomelinge, daz zcu vortedingin und by rechte behaldin, alz andir unser stat sachin. Daz deze vorgeschrebin rede stete und gancz sal gehaldin werdin ane ark, dez habe wir unser stat yngesegil an desin bryf lossin hengin zcu eyne bekentnus. Gegeben noch gotis geburt dryczen-
 5 hundert jor und dornoch yn dem zcwey und sechczegistin jore an sente Vincenti tage des heylegin merterris.

28.

Bernhard Herr zu Kamenz leihet 20 Groschen Zins und andere Nutzungen auf Seyfferts Erbe zu Bischheim, welche Frau Ilse, Herrn Reinhardts Witwe, an Frau Kunne, die Witwe von Heinrich Kost, verkauft hat, dem von letzterer gestifteten Seelhause erblich. 1362 Febr. 21.

Hdschr.: Or. Perg. Stadtarchiv Kamenz No. 64. Das kleine S. an Pergamentstreif. Bild: der Kamenzsche Adlerflug. Von der (meist abgebrochenen) Umschrift nur noch zu erkennen: . . . rt menz.

Wir Bernhart herre zcu Kamencz bekennyn yn desim kenwurtegin offenen bryfe alle den, dy in sehin adir horin lesin, || daz vor uns ist gewest dy erber vrowe Ilze, hern
 15 Reynharez eliche husvrowe, dem got gnade, von Byschofsheym || und hot ufgelozsin myt gutim willim und myt wolbedochtin müte zwenczik grosschin jeregis zcinsis, zcene uf sente || Walpurgin tak und zcene uf sente Mychels tak, wenne adir wy dikke dy vorgeanten tage komen yn deme jore, vyr hünre uf sente Mychels tak alle jor, eyn schok eygir alle jor uf östern, eynen grosschin von eynre sichiln alle jor, dry grosschin vor dry
 20 pfluge alle jor, dry scheffil korns und dry scheffil habirn alle jor uf sente Mychels tak yn deme dorfe zcu Byschofsheym geleyn, uf Syfircz erbe. Desin vorgeschrebin zcins und genys lye wir Bernhart herre zcu Kamencz und habin gelegin der erbern vrowin Cunnan der Kostynne, unser burgerynne zcu Kamencz, zcu eyne rechtin erbe und erplich und eweclich zcu deme zelhüze, daz dy vorgeante vrowe Cunne gestift und gebüwit
 25 hot, myt sulchim underscheyt, daz wir unse oberste recht uf demeselbin gute behaldin. Ouch sal dy egenante vrowe Cunne des vorgeschrebin zcins und genys gewaldik syn, dy wyle ze lebit; dornoch, wenne got obir ze gebüt, so sal der goczhusman zcu Kamencz, wer der ist, denselbin zcins und genys ynfordern und den antwurtin den armen lutin, dy yn deme vorgeschrebin zelhuse syn, wer dy syn. Obir daz allis hat vor uns gelobit dy
 30 vorgeschrebene vrowe Ilze, hern Reynharez eliche husvrowe, dem got gnade, von Bischofsheym der erbern vrowin Cunnan der Kostynne, dy den vorgeschrebin zcins und genys weder ze kouft und vorgoldin hot, ze dezzelbin gutis zcu untwerrin ken iren kindin und ken allir menneglych dornoch. Daz deze vorgeschrebin rede stete und gancz sy ane ark, dez habe wir unser yngesegil an desin bryf lossin hengin zcu eynre bevestenunge. Ge-
 35 gebin noch gotis geburt dryczenhundert jor dornoch yn deme zcwey und sechczegistin jore an sente Petirs obinde, also alz her zcu bobiste irhot wart. Dirre vorgeschrebin rede sint gezcuk Nikkil Went burgermeyster, Hannus von Gerlachschorf, Henczil Becherer, Opecz Kursener, Heynich Beygir, Henczil Arnolt, Vriczce Geylnow, Kuncze Stenter, Nickil Goricz, Kuncze Prascow, Nyckil Zconeke, Mychel Ramenaw, Hannus Rudeger,
 40 rotlute zcu dem mol czu Kamencz, und andere bedirwin lute gnuk.